

BOSNA I HERCEGOVINA
FEDERACIJA BOSNE I HERCEGOVINE
UNSKO – SANSKI KANTON
GRAD BIHAĆ
GRADONAČELNIK

Broj: 07/2-11-1766

Bihać, 28.02.2021. godine

Na osnovu člana 183. stav (2) Poslovnika Gradskog vijeća ("Službeni glasnik Grada Bihaća", broj 03/16), a u vezi sa članom 52. Statuta Grada Bihaća ("Službeni glasnik Grada Bihaća" broj 13/15 i 13/18) Gradonačelnik u svojstvu predlagača propisa i drugih akata

ODREĐUJE

za izvjestioca Dario Jurić - šef odsjeka za društvene djelatnosti u Službi za opću upravu i društvene djelatnosti,
na sjednici Gradskog vijeća i radnim tijelima po prijedlogu tačke dnevnog reda:

Odluka o subvencioniranju dijela troškova komunalnih usluga vodosnabdijevanja i odvodnje i prečišćavanja otpadnih voda

Gradonačelnik
Šuhret Fazlić

BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
GRAD BIHAĆ
GRADONAČELNIK

Broj: 07/2-11-1766

Bihać, 28.02.2021.godine

GRADSKO VIJEĆE BIHAĆ

-ovdje-

PREDMET: Prijedlog Odluke o sufinansiranju dijela troškova komunalnih usluga
vodosnabdjevanja i odvodnje i prečišćavanja otpadnih voda.

OBRAZLOŽENJE

I PRAVNI OSNOV

Pravni osnov za donošenje predložene odluke sadržan je:

- u članu 37. Zakona o socijalnoj zaštiti, zaštiti civilnih žrtava rata i zaštiti porodice sa djecom („Službeni glasnik USK“, broj 5/00, 7/00 i 11/14), kojim je regulisano da se propisima općina se može proširiti krug korisnika i prava iz socijalne zaštite.

- u članu 35. tačka c) Statuta Grada Bihaća („Službeni glasnik Grada Bihaća“ broj 13/15 i 13/18) koji propisuje da Gradsko vijeće u okviru samoupravnog djelokruga donosi odluke i druge opće akte kojima uređuje pitanja iz samoupravnog djelokruga Grada i daje njihovo tumačenje.

II RAZLOZI ZA DONOŠENJE

Grad Bihać je potpisivanjem Pisma namjere 31.1.2017. godine započeo implementaciju Projekta MEG- Projekt općinskog ekonomskog i okolišnog upravljanja ,kojeg finansira Vlada Švicarske a implementira ga Razvojni program Ujedinjenih nacija (UNDP). Projekt obuhvata tri komponente:efikasni sistem upravljanja lokalnim ekonomskim razvojem,

unaprjeđenje kvaliteta usluga prema građanima i privrednom sektoru, te unaprijede regulatornog okvira na lokalnom nivou u svrhu unaprjeđenja javnih usluga.

Uz konsultantsku pomoć u okviru projekta MEG pripremljen je Prijedlog Ugovora o pružanju javnih vodnih usluga sa popratnim priložima koji je unificiran i jedinstven za sve općine koje su obuhvaćene projektom, a radi se o sljedećim jedinicama lokalne samouprave: Tešanj, Teslić, Žepče, Bosanska Krupa, Gračanica, Gradiška, Prijedor, Cazin, Velika Kladuša, Bihać, Doboj, Kiseljak, Tuzla, Gradačac, Prnjavor, Kozarska Dubica, Kostajnica i Sanski Most.

Ugovor o pružanju javnih vodnih usluga na području Grada Bihaća Gradonačelnik Grada Bihaća je potpisao sa JP "Vodovod" Bihać dana 10.7.2017. godine, broj; 01-25-5133/17
Potpisivanjem Ugovora usvojeni su između ostalog slijedeći dokumenti

- Prijedlog Metodologije za određivanje cijene vodosnabdijevanja i odvodnje otpadnih voda koji je sastavni dio Ugovora o pružanju javnih vodnih usluga na području Grada Bihaća i
- Prijedlog Programa subvencioniranja dijela troškova komunalnih usluga vodosnabdijevanja i odvodnje i prečišćavanja otpadnih voda za socijalno ugrožene kategorije stanovništva koji je sastavni dio Ugovora o pružanju javnih vodnih usluga na području Grada Bihaća.

Metodologijom za određivanje cijene vodosnabdijevanja i odvodnje otpadnih voda u tački 3 "Osnovni principi i mjere za njihovo postizanje" definisan je princip priuštivosti u kojem se navodi slijedeće:

„Za korisnike koji ne mogu da plate vlastiti račun za vodne usluge, JLS treba da osiguraju sredstva za subvencioniranje vodnih usluga ovih kategorija korisnika. Način subvencioniranja vodnih usluga treba da izabere JLS, te da se količina vode čije bi plaćanje bilo subvencionirano po osobi ograniči na najviše 3m³ vode mjesečno."

Ugovorom o pružanju javnih vodnih usluga na području Grada Bihaća broj 01-25-5133/17 od 10.7.2017. godine u Članu 18. između ostalog definisano je:

„Na godišnjem nivou u Budžetu Grada obezbjeđuju se finansijska sredstva za subvencioniranje troškova javnih vodnih usluga određenim kategorijama socijalno ugroženih lica – korisnika javnih vodnih usluga."

Posebnom gradskom odlukom uređuje se subvencioniranje troškova javnih vodnih usluga socijalno ugroženim kategorijama korisnika javnih vodnih usluga.

Programom subvencioniranja dijela troškova komunalnih usluga vodosnabdijevanja, odvodnje i prečišćavanja otpadnih voda za socijalno ugrožene kategorije stanovništva navodi se slijedeće:

„Sredstva za subvencioniranje osigurava Grad kroz godišnji budžet.

Predloženom Odlukom se definiraju uslovi pod kojim će se provesti postupak subvencioniranja, a obavezno će sadržavati:

- Pravo na subvencioniranje (ko i pod kojim uvjetima ostvaruje pravo na subvencioniranje);
- količina utrošene vode koja se subvencionira (u m³);

III FINANSIJSKA SREDSTVA

Za realizaciju ove Odluke u Budžetu grada Bihaća za 2021. godinu planirana su sredstva u iznosu od 15.000,00 KM.

Prilog: Prijedlog Odluke

Gradonačelnik

Šuhret Fazlić

Na osnovu člana 37. Zakona o socijalnoj zaštiti, zaštiti civilnih žrtava rata i zaštiti porodice sa djecom („Službeni glasnik USK“, broj: 5/00, 7/01 i 11/14), člana 35. tačka (c) Statuta Grada Bihać (Službeni glasnik Grada Bihaća broj 13/15 i 13/18), Gradsko vijeće Bihać, na sjednici održanoj dana 2021. godine donijelo je

O D L U K U

o subvencioniranju dijela troškova komunalnih usluga vodosnabdijevanja i odvodnje i prečišćavanja otpadnih voda

DIO PRVI – OPĆE ODREDBE

Član 1.

(Predmet odluke)

Ovom Odlukom propisuju se: kategorije korisnika, uslovi, kriteriji i način utvrđivanja prava na subvencioniranje dijela troškova komunalnih usluga vodosnabdijevanja, odvodnje i prečišćavanja otpadnih voda, (u daljem tekstu: "subvencioniranje"), troškovi koji se subvencioniraju, organi odlučivanja, prestanak prava, potrebna sredstva kao i način finansiranja.

Član 2.

(Značenje pojedinih pojmova)

Pojedini pojmovi navedeni u ovoj Odluci imaju slijedeće značenje:

a) Socijalno ugrožena lica s nedovoljnim prihodima za život su lica koje ostvaruju pravo prema Zakonu o socijalnoj zaštiti, zaštiti civilnih žrtava rata i zaštiti porodice s djecom Unsko-sanskog kantona.

b) Subvencioniranje cijene komunalne usluge podrazumijeva plaćanje dijela troškova usluga vodosnabdijevanja, odvodnje i prečišćavanja otpadnih voda koje pruža JP“Vodovod“ d.o.o.Bihać, za korisnike tih usluga za koje se na osnovu kriterija iz ove Odluke utvrdi da spadaju u kategoriju lica u stanju socijalne potrebe.

DIO DRUGI – USLOVI KRITERIJI I NAČIN UTVRĐIVANJA PRAVA

Član 3 .

(Ostvarivanje prava na subvencioniranje)

(1) Subvencioniranu cijenu ostvaruje pojedinac ili porodica(u daljem tekstu korisnik komunalne usluge) i to fizička lica koja su vlasnici ili zakupci stambenog prostora, a koja ispunjavaju kriterije iz ove Odluke.

(2) Subvenciju može ostvariti zakupac samo pod uslovom da je zaključio ugovor o zakupu u kojem je utvrđeno da je obavezan plaćati troškove komunalnih usluga.

(3) Pravo na subvenciju ostvaruje korisnik komunalne usluge koji ima prebivalište na području grada Bihaća i korisnik je:

- a) stalne novčane pomoći,
- b) naknade za pomoć i njegu drugih lica ostvarene po kantonalnom propisu,
- c) naknade za osposobljavanje za život i rad,
- d) lica koja su koristila jednokratnu novčanu pomoć putem JU "Centra za socijalni rad" Bihać.

Član 4.

(Količina vode koja se subvencionira)

(1) Maksimalna mjesečna količina isporučene pitke vode i količina otpadnih voda po članu domaćinstva korisnika komunalne usluge ne može preći 3m³.

(2) Razliku u iznosu mjesečnog računa za količinu isporučene pitke vode i količinu otpadnih voda koja nastaje potrošnjom većom od 3m³ po članu domaćinstva korisnika komunalne usluge, snosi korisnik.

Član 5.

(Uslovi za ostvarivanje prava)

Opšti uslovi koje mora ispuniti korisnik komunalne usluge su:

- a) da podnosilac zahtjeva i članovi domaćinstva imaju prebivalište na području grada Bihaća,
- b) da se nekretnina za koju se izdaje račun za pružanje usluga vodosnabdijevanja i odvodnje i prečišćavanja otpadnih voda nalazi na području grada Bihaća i
- c) da račun za pružanje usluga vodosnabdijevanja i odvodnje i prečišćavanja otpadnih voda glasi na ime podnosioca zahtjeva ili zakupodavca s kojim korisnik usluge ima zaključen ugovor o zakupu stambenog prostora.

Član 6.

(Postupak za ostvarivanje prava na subvenciju)

(1) Postupak za ostvarivanje prava na subvencioniranje provodi JU "Centar za socijalni rad" Bihać; a pokreće se na zahtjev lica koja želi ostvariti pravo na subvencioniranje.

(2) Uz zahtjev za subvencioniranje troškova iz člana 5. ove Odluke podnosilac zahtjeva prilaže:

- a) uvjerenje izdato od strane "JU Centar za socijalni rad" Bihać,
- b) kućnu listu,
- c) PBA - 1 obrazac,
- d) posljednji račun izdan od strane JP "Vodovod" d.o.o. Bihać, za pružanje usluge i isporuke pitke vode, odvodnje i prečišćavanje otpadnih voda.

Član 7.
(Službena evidencija)

(1) JU "Centar za socijalni rad" Bihać je dužan sačiniti službenu evidenciju o korisnicima koji ostvaruju pravo na subvencioniranje.

(2) Evidencija sadrži:

- a) lične podatke o korisniku: ime, ime oca, prezime, datum rođenja, adresa stanovanja, bračno stanje, datum upisa u evidenciju,
- b) podatke o utvrđenom statusu korisnika subvencije,
- c) podatke o članovima porodice (ime, očevo ime, prezime, zaposlen, nezaposlen, penzioner, učenik, student, korisnik stalne socijalne pomoći),
- d) podatke o statusu stanovanja (vlasnik stana/kuće, korisnik stana/kuće, član domaćinstva, zakupac stana/kuće).

(3) U postupku sačinjavanja službene evidencije po službenoj dužnosti se pribavlja posljednji račun izdat podnosiocu zahtjeva od strane JP "Vodovod" d.o.o. Bihać, te uvjerenje JU "Centar za socijalni rad" Bihać o pripadnosti kategoriji lica iz člana 3. stava (3) ove Odluke.

Član 8.
(Uvjerenje)

(1) Nakon sačinjavanja službene evidencije, JU "Centar za socijalni rad" Bihać izdaje uvjerenje o činjenicama o kojima vodi službenu evidenciju i dostavlja ga JP "Vodovod" d.o.o. Bihać.

(2) Sastavni dio uvjerenja je spisak korisnika subvencionirane komunalne usluge, sa slijedećim podacima:

- a) broj članova domaćinstva podnosioca zahtjeva i
- b) mjesečnu količinu vode koja se subvencionira.

Član 9.
(Obaveze javnog preduzeća)

(1) Na osnovu uvjerenja koje dostavlja JU "Centar za socijalni rad" Bihać, JP "Vodovod" d.o.o. Bihać, dužno je izdati račun za svakog korisnika pojedinačno.

(2) Prilikom izrade mjesečnih računa JP "Vodovod" d.o.o. Bihać će razgraničiti iznos koji se subvencionira, odnosno kojeg plaća Grad Bihać i iznos koji plaća korisnik subvencije.

(3) Javno preduzeće "Vodovod" d.o.o. Bihać, dužno je izdati račun o pruženoj usluzi

isporuke pitke vode korisniku iz stava (1) ovog člana, te isti dostaviti JU "Centar za socijalni rad" Bihać.

(4) Po prijemu računa iz stava (3) ovog člana JU "Centar za socijalni rad" Bihać dužan je sačiniti obračun subvencioniranog dijela korisnika usluge, te isti dostaviti Službi za finansije.

(5) Služba sa finansije po prijemu obračuna izvršit će plaćanje subvencioniranog dijela JP "Vodovod" d.o.o. Bihać.

Član 10.

(Neispunjenje uslova za subvencioniranje)

(1) Ukoliko podnosilac zahtjeva ne ispunjava uslove za subvencioniranje, propisane ovom Odlukom, izdaje mu se uvjerenje da se ne nalazi na evidenciji korisnika komunalnih usluga koji ostvaruju pravo na subvencioniranje dijela troškova komunalnih usluga vodosnabdijevanja, odvodnje i prečišćavanja otpadnih voda.

(2) Ako stranka na temelju dokaza kojima raspolaže, smatra da joj uvjerenje nije izdano u skladu sa podacima iz službene evidencije, može zahtijevati izmjenu uvjerenja.

(3) JU "Centar za socijalni rad" Bihać, ako je zahtjev opravdan, izdaće novo uvjerenje u kojem će biti izmjenjene određene činjenice.

(4) Ako se utvrdi da se ne može izdati novo uvjerenje, zahtjev stranke će se odbiti rješenjem na koje stranka ima pravo žalbe.

Član 11.

(Žalba)

Žalba se podnosi Komisiji za žalbe Gradskog vijeća Grada Bihaća, u roku od 15 dana od dana prijema rješenja, a predaje se putem JU " Centra za socijalni rad" Bihać.

DIO TREĆI - PRESTANAK PRAVA NA SUBVENCIONIRANJE I SREDSTVA

Član 12.

(Prestanak prava)

(1) Korisnici koji su ostvarili pravo na subvencioniranu cijenu utvrđenog dijela troškova komunalnih usluga vodosnabdijevanja, odvodnje i prečišćavanja otpadnih voda, a kod kojih u međuvremenu dođe do promjena koje su od uticaja na ostvarivanje utvrđenog prava (promjena prebivališta, broj članova domaćinstva, zaposlenje i druge činjenice koje dovode do promjene statusa korisnika), obavezni su u roku od 15 dana od dana nastale promjene, obavijestiti JU "Centar za socijalni rad" Bihać.

(2) JP "Vodovod" d.o.o. Bihać je dužan u roku od 3 dana od dana saznanja da su nastupili uslovi iz stava (1). obavijestiti JU "Centar za socijalni rad" Bihać.

(3) Ukoliko dođe do promjena koje bitno utiču na uslove subvencioniranja JU "Centar za socijalni rad" Bihać dužan je po službenoj dužnosti u roku od 3 dana obavijestiti JP "Vodovod" d.o.o. Bihać o nastalim promjenama.

(4) JU "Centar za socijalni rad" Bihać će brisati korisnika iz službene evidencije.

Član 13.
(Postupak brisanja)

(1) JU "Centar za socijalni rad" Bihać, licu koje je brisano iz službene evidencije korisnika koji su ostvarili pravo na subvencioniranje dijela troškova komunalnih usluga, izdaje rješenje kojim se utvrđuje prestanak prava na subvencioniranje.

(2) Na rješenje iz stava (1) stranka ima pravo žalbe.

(3) Žalba se podnosi Komisiji za žalbe Gradskog vijeća Grada Bihaća, u roku od 15 dana od dana prijema rješenja, a predaje se putem JU "Centra za socijalni rad" Bihać.

(4) Rješenje Komisije za žalbe Gradskog vijeća Grada Bihaća je konačno.

Član 14.
(Potrebna sredstva)

Sredstva za realizaciju ove Odluke obezbjeđuju se u Budžetu Grada Bihaća za 2021. godinu.

DIO ČETVRTI - ZAVRŠNE ODREDBE

Član 15.
(Nadzor nad provođenjem odluke)

Nadzor nad provođenjem ove Odluke vrši Gradonačelnik putem Službe za opću upravu i društvene djelatnosti.

Član 16.
(Stupanje na snagu)

Ova Odluka stupa na snagu osmog dana od dana objavljivanja u „Službenom glasniku Grada Bihaća“ a primjenjuje se od .2021.godine.

Predsjedavajući gradskog vijeća
Zulfikar Handukić

Gradsko vijeće

Broj:

Bihać,

